

## **Warga UMP Serentak Membaca untuk 10 Minit**

Pekan, 23 April – Perpustakaan Universiti Malaysia PAhang dengan kerjasama Perpustakaan Awam PAhang (PPAP) melancarkan program Jom Baca Bersama Untuk 10 Minit bersempena dengan Sambutan Hari Buku dan Hakcipta Sedunia hasil anjuran Perpustakaan Awam Negeri-Negeri Se-Malaysia yang disambut di seluruh negara baru-baru ini. Program bermula pada jam 10.00 dan berakhir 10 minit kemudiannya ini merupakan sebahagian daripada gerakan membaca yang dijalankan setiap tahun sebagai usaha berterusan membentuk masyarakat ke arah membudayakan tabiat



membaca.



Menurut Ketua Pustakawan UMP, Haji Ruslan Che Pee berkata, mengambil inspirasi daripada konsep sambutan Earth Hour, semua peserta tanpa mengira apa jua pekerjaan atau aktiviti yang sedang dilakukan akan sama-sama berhenti sebentar dan membaca selama 10 minit secara serentak. "Pelaksanaan program ini diharapkan dapat memupuk minat membaca di kalangan rakyat Malaysia sekaligus memartabatkan pustakawan sebagai tempat yang perlu dikunjungi walaupun selepas belajar. Ianya merupakan inisiatif membaca di bawah kelolaan setiap perpustakaan awam negeri masing-masing bersama Majlis Pengarah-Pengarah Perpustakaan Awam Se-Malaysia," katanya.





Tambah beliau, program juga bertujuan menjenama inisiatif membaca dengan tujuan menjadikan perpustakaan sebuah organisasi yang relevan dalam pendidikan selepas waktu persekolahan (*school after school*).

Selain itu, program sebegini dapat mewujudkan sinergi yang cekap antara perpustakaan awam negeri seluruh Malaysia dengan pihak Jabatan Pendidikan Negeri, jabatan dan agensi lain di peringkat negeri dan nasional dalam merangka proses pembelajaran sepanjang hayat yang holistik.

Bagi Pengarah Program Peringkat UMP, Dzull Zabardon Ahmad yang juga Timbalan Ketua Pustakawan berkata, program ini disifatkan sebagai suatu usaha mempertingkatkan kesedaran masyarakat kampus yang terdiri daripada pelajar dan staf terhadap budaya membaca melalui aktiviti membaca bersama-sama secara serentak walaupun hanya selama 10 minit. Beliau mengharapkan pada masa akan datang program ianya akan disertai lebih ramai staf di jabatan dan fakulti sebagai menyokong usaha kerajaan dalam membantu menggalakkan budaya membaca di kalangan rakyat Malaysia .

Beginu juga dengan Pegawai Sains UMP dari Makmal Berpusat, Idayu Mat Ali berkata, program ini merupakan program yang agak ringkas tetapi menarik dan mampu memberi impak kepada staf. Melalui program ini, staf boleh meluangkan sedikit masa iaitu selama 10 minit dalam waktu bekerja untuk membaca apa jua bahan bacaan ilmiah yang berada di jabatan. Katanya, ianya dapat menyuntik kesedaran betapa pentingnya membaca dalam kehidupan sehari-hari sebagai satu proses untuk meningkatkan ilmu pengetahuan selain untuk tujuan kerja semata-mata. Program ini bukan sahaja mendapat sambutan dalam kalangan staf di kedua-dua kampus Pekan dan Gambang malahan melibatkan pihak luar yang berada dalam kampus universiti.

*Berita dan gambar disediakan oleh Nazatul Shima Barozi dari Perpustakaan UMP dan disunting Bahagian Komunikasi Korporat PNC.*

Posted By : NOR FADZILLAH BINTI ZULKIPLI Date Posted : 27-05-2015, 15:58:38